

欽
定
全
唐
文

欽定全唐文卷八百三十目錄

徐寅

五王宅賦

豐年爲上瑞賦

垂衣裳而天下治賦

首陽山懷古賦

均田賦

朱虛侯唱田歌賦

口不言錢賦

衡賦

寒賦

樊噲入鴻門賦

雷發聲賦

人生幾何賦

鮫人室賦

京兆府試入國知教賦

澗底松賦

止戈爲武賦

御溝水賦

白衣入翰林賦

山暝孤猿吟賦

歌賦

毛遂請備行賦

江令歸金陵賦

隱居以求其志賦

朱雲請斬馬劍賦

義漿得玉賦

勾踐進西施賦

斬蛇劍賦

過驪山賦

柳璨

移置元元觀奏

請黜司空圖李敬義奏

欽定全唐文卷八百三十

徐寅

寅字昭夢莆田人第進士授祕書省正字閩中王審知辟佐幕府

五王宅賦

明皇帝以孝悌爲家此地宅而宸遊未賒淒涼而一景空
鏤悵望而諸王已遐鳳去鸞歸秋葉落梧桐之樹年來歲
改春風遺棠棣之華當其龍虎俱來蚪螭並轡觀風而玉
輦停駕選勝而金鼇負地天師魯匠新土木以宏規月殿

雲樓破荆榛之積翠旣而甲第煌煌維城道傍雍然而帝
子天子肅睦而寧王薛王綵霧彤霞從仙都之八面風臺
水榭引蓬島於中央不類遷都平分于宅爲星之渚同數
疑比奕之龍並跡聖主之千聲羯鼓洛水風清岐山之數
調胡琴嵩山月白瑞氣飄空蘭深麝濃連雲之飛閣鏤鳳
象海之清池蟄龍解愠當風帝舜之琴雅奏興歌立德太
康之弟相從莫不以嘉樹濛煙崇墉硤日金聲玉韻以總
綺夏萼春藜而剪出紅梁綺棟眩天地以量功舞態歌容
掌神仙而比質一旦袞冕參差外遐內微華堂之帳幄蟲

蠹深院之樂榼燕飛時移而玉笛誰吹清商泯滅事往而
金牌尚在御墨依稀徒令攀詠皇恩追思聖德傷晏御以
綿延遠周垣而嘆息王侯之地宅雖存未若開元之有國

豐年爲上瑞賦

以年穀豐盈用
此爲瑞爲韻

聖祚開國文皇應天以豐穰之有歲作祥瑞於當年重彼
粢盛五稼而誠宜在上方諸圖牒四靈而莫得居先當其
衆類呈祥明君建議將垂萬世之範迴出百王之智爲其
三農百穀普爲四海之資驚驚騶虞空表一人之瑞於是
別示休禎義農教行調風雨則桑田自稔重龜鶴則倉廩

寧盈我貴嘉禾朱草之庭前謾吐我資甘澤慶雲之天際
休呈四序和平三時播種蓋將何寶而爲寶不以無用而
爲用且夫寒暑相從成霖順風如雲之稼穡千畝擊壤之
歌聞四聰斯則家給人足時和歲豐縱鳳不止于高梧之
際麟不遊于靈囿之中又豈能損民力虧朕躬至如歷候
不常陰陽反是甫田屢失於刈穫庶物不勝其殘毀菜色
咸若豆分於此縱然出醴泉而浪湧波翻降甘露而珠英
玉藥然而不濟饑饉何足倚依豈若敬奉天時從其所宜
升合穎秀岐之事冠素雀神烏之爲罹畢沾濡麗日之重

輪在下如茨委積華芝與玉秀俱卑偉哉以年爲瑞者富
於生靈以物爲瑞者詭於耳目欽哉以我后之元德承太
宗之景福士有觀大國之光輝敢謳謠於邦國

垂衣裳而天下治賦

大道純素明君御乾垂衣裳而教被率土泯智慮而恩覃
普天端袞冕於九重威儀備矣走車書於萬國文軌同焉
聖人以象體乾坤育涵臣子握金鏡而破昏黑啟瑤圖而
昭福祉溫恭允塞損耳目以無營拖黼垂旒致邦家而自
理不出宸居潛飛聖謨虛已而應乎萬有滅私而契彼三

無引日月之長裾遐蘇品彙雍星辰之法服自化寰區於
是宸座彤闈凝情恭已播亭毒以無黨表雍熙而有自山
龍煥爛映黃屋於長關風雨迴旋仰洪猷而克遂豈不以
義頊齊教皐夔在官德所至今天高地厚信不愆兮春煦
冬寒佩華藻以常閑九章惟麗傾空旻之所覆萬姓皆懽
允紹二皇式孚九野尊揚襲以居上敦協和而在下飄紫
宸而楚楚道泰生靈臨丹陛以謦謦塵清華夏赫赫巍巍
功高二儀法希微於視聽守元默於箴規自然淳樸將至
生成罔虧苟人文之未化勞轍迹以何爲豈若黼黻光中

德及於昆蟲草木彩章影裏澤流於地角天涯士有珪璧
常輕光陰是重趨明代以求試望丹霄而翹踵君同軒后
爲臣願讚於衮衣才匪相如獻武載歌於垂拱

首陽山懷古賦

首陽山兮非秀非隆因其賢而名高碧空偶巖谷之逋客
問夷齊之古風厚殷紂而薄宗周易稱仁智棄三隅而執
一向可謂昏蒙且紂以斲脛求歡剖心取樂空褰瀛不足
以充其欲罄竹帛不足以編其惡民驚而萬國崩離天怒
而三光舛錯肉爲林也怪山岳之非高酒爲池焉笑江湖

之易涸姬乃畋於渭濱會於盟津右白旄而左黃鉞應乎
天而順其人莫不洗塗炭於四海解仇讐於萬民著金縢
者乃昆乃仲鈞玉璜者持衡秉鈞何不弔紂之不德慶周
之有國而乃助於紂以申謙怨於周而不食鴻飛豹隱亡
情於濁浪之湄蟬腹龜腸化骨於孤峯之側逋客曰夷齊
以讓國無爲求仁立規何厯數之不究曷興亡而不知非
不知周之可輔紂之可隳所憂者萬紀千齡所救者非一
朝一夕恐後代謂國之可犯謂君之可迫强者以之而起
亂勇者以之而思逆所以激其時抗其迹往者勗而來可

懲義要行而身不惜余乃陟彼高岡遐思耿光嶺上之松
筠抱直邱中之黍稷非香未知靈氣何化身魂曷彰爲聖
賢則孔子顏子作嘉瑞則麒麟鳳凰縱天柱折而地軸摧
斯民不泯任月兔死而日烏銷厥德愈芳於戲鍾其濁則
爲佞爲邪稟其清則爲英爲異垂名之士餓林藪飽食之
人硤天地疑是宜徵繪事而寫高山仰止先賢之志

均田賦

嗟阡陌之開兮肆兼并之不仁古制不可以卒復兮迺議
田之是均鬱林林之黎元兮資稼穡以爲生旣教養之無

法兮宜貧富之不平繫口分而畫野兮允經國之大式必
邑地之相參兮限田萊而有極土不遺利兮人無闕力派
頃田於單陋兮制強宗之侵陵獲資生之大利兮免豪右
之倍徵此均田之大畧兮見寫圖之詳悉將損多而益寡
兮齊民之歸一相爾疇之紛紛兮畝爲數其秩秩露田之
四十兮配桑田之二十定盈縮於還與受兮各分牛以自
給強不敢於占奪兮弱猶得以播殖圖雖卷之不盈兮備
輿地之所有桀良策於指掌兮念生靈其獨厚懿元魏之
文辟兮獨有志於古制也苓用夏以變易兮昭大和之康

又也唐有臣曰元稹兮圖均田於德宗幸皇覽之見收兮
路逶迤而不通迄柴周之顯德兮迺畱心於務農頒稹圖
於諸鎮兮均境內之租庸雖不能伯仲於魏之君兮亦拔
萃於五季也視貞元之聚斂兮誠何足與議也慨圖遠而
名存兮異索駿之丹青儻按圖以取則兮吾固知其有誠
伊李泌之震書兮與斯圖其表裏當中和而進獻兮務本
之深意彼輿地非元圖兮徒經營乎版籍豳風之亦有圖
兮欲勤勞夫稼穡豈若名田之與限兮猶總總其可行也
實醇儒之良計兮均井田之一平也亂曰均田有圖稹所

金史卷之三
作兮厥制初行魏之度兮桑井旣復孰諗其故兮索空圖
於實効兮庶幾太平之助兮

朱虛侯唱田歌賦

國不危無以見英智智不周何以殄姦詭當漢室之架亂
有劉章之崛起於是謳甫田拍清徵當其呂氏窺鼎劉宗
履冰社稷騫崩邦家替凌或呂氏必興劉氏不勝雖諸將
之賈勇終按劍以未能鯨躍海以須斬狐居城而暫驚旋
聞玉殿窮歎瓊筵命酒貂璫皆戚里豪貴冠蓋盡台階賓
友賢愚但委其天命綱紀定輸於誰手章欲刮其瑕滌其

垢摧其凶破其醜掌握於龍圖鳳歷已斷言前縱橫其地
軸天樞猶歸太后朱虛乃誓遏頽波平妖剋訛得則赫功
名於日月失則化壅粉於干戈在其誠而不在其衆言於
我而不計於他於時玉爵驟朱顏酡直氣仰接昌言切磋
曾專執耒之功多能鄙事粗續貫珠之韻請唱田歌歌曰
舜之耕兮稷之植廓民天而知稼穡疎其苗而固其蒂法
於家而象於國又曰沮之耕兮溺之耘灌漑盛兮除莠芬
扶蠹賊兮多稼稔剪榛蕪兮嘉穀分取厥類兮去非類諭
於臣而象於君想其傾海未竭轉喉未闕衆愉怡而詭譎

我憤惋而剛烈怒聲徹天地託雅調以成聲熱血煎肺肝
瞬明眸而漬血且以酒不罰無以肅否臧令不正無以決
存亡宣酒令而爲軍令假樂章而行國章犯令者沔爾宮
而鬼爾族亡酒者肉爾膾而血爾漿我唱也不在深耕淺
種我志也克在乎帝業皇綱俄而烹一呂禁陸梁侍坐者
汗滴膽碎傍觀者心顛魄狂呂之強倏爾而弱劉之弱歟
爾而強不日計之取兵之舉帝諸劉虜諸呂有若乎摧枯
拉朽反似乎平秦破楚故得告功於聖祖削平乎子孫安
子孫而總英傑故能復宗社而正乾坤向若口不能唱唱

不能言則國豈定而家豈存者也余欲編田歌於樂府上聞於至尊

口不言錢賦

以息心祕口欲作窮言爲韻

言者三端之本錢者百貨之源反其本以行已失其源而不言如逢貫朽之資我辭遽默自負不貪之寶吾道常存昔王衍以東晉季年金陵薄俗恨朝野以爭侈競緡錢而縱欲化爲糞土填巨壑以難盈湧作波瀾灌漏卮而不足豈惟紫閣名臣紅窻美人有私而盡切藏賄無德而何嘗潤身夷甫乃怒於彼而心誓忿於時而氣振所以塵尾高

談肯說五銖之號鶴裘換酒同思四壁之貧泉貨寧懷樞
機永祕何曾之食萬休述和嶠之癖多罷議賓階砌下誰
云苔點之圓貨殖傳中諱卻金錢之字衆多愛兮積聚奢
淫我所愛兮唯財於金在心所惡以言寢可以觀言而見
心任銅臭以驚時豈論崔烈任雨飛而滿屋靡說黃尋且
夫巨萬奚若仁銷義鑠豈不見一惡而懼百非口非言而
心嫉惡金相馬埒休詢王濟之奢爲山積鹿臺莫問殷辛
之禍作蓋傷其濁世澆風貪婪莫充無苟得者猶寡終不
言而曷同斯時也道德銷盡錢刀削空斯人則與世垂範

端身固窮手近青蚨先納雌黃之口內眼觀榆莢預緘枝
葉於胷中則知不立殊規寧議衆醜他拭目而余目昏彼
鑲金而此金口異哉不談人過不語怪神與斯人而善偶

衡賦

以儀止泰一無
淺觀業爲韻

搜聖人之垂象伊茲衡之可觀材徑挺以繩直星連綿而
珠攢惟用也眊庶不能以多少隱惟平也輕重不能以詐
僞干故得萬人便於廛里物或紛競可以定黍累之圭撮
利其分毫可以觀低昂之容止執中以告無或不喜則夫
衡之爲物其用甚大四方正而域中平七政齊而天下泰

動而無欲任之故絕私益而無方行之固不害然能思無
不踐應倉舒刻舟之深淺問無不知表張重度骨之威儀
若乃均其神道形其事業聖人因之以平施邊鄙賴之而
不怯豈欲決其差謬明其有無小人取之以作則君子見
之而交孚則有王臣蹇蹇宰職秩秩洞鑒人才神無隱質
諒茲衡之攸婉故守之而勿失倘陳平之見知宰州縣之
如一

寒賦

以色悴顏愁臣
同役也爲韻

壬子歲大雪濛濛繁雲鑲空白日光沒樵蹊脈窮地洞沍

而履不得天飈颺而飛不通庭蘭落翠禁樹催紅安處王
乃去廣殿即深宮獸炭呀焰狐裘禦風頻謂左右曰寡人
今日之寒斯甚曷與下民而同憑虛侯進言曰大王自恐
嚴凝罔憂邦國下民將欲凍死大王未有寒色王曰下民
之理聞之可得對曰只如負禦三邊彌年不還戍遠燕嶺
衣單鴈山鐵甲冰徹金刀血殷風刮衰力砂昏少顏大軍
之生死頻決上國之英豪甚閑今則凍平遼水雪滿蕭關
此戰士之寒也王曷知其險艱至若荷鍤田里勞乎農事
草荒而耒耜無力地冷而身心將悴賦役斯迫鋤耰何利

凍體斯露疏蓑莫庇東臯孰閑其耕耘北闕但爭其祿位
今則元律將結元冬已繼此農者之寒焉王曷知其憂愧
復有萬里辭親求名進身韜玉待價然金食貧賀清平於
四塞冒霜霰於三秦北戶無席冬衣有鶉幸偶乎勛華爲
主同思乎伊呂稱臣今則顓頊威至元冥令臻此儒者之
寒焉王曷知其苦辛別有苦寒之者不能殫寫在臣說矣
恐王煩也於時陽氣收陰氣浮火井滅朔風愁千山之凍
樹頻折八水之凝波不流王乃閑征戰之勞命偃乎兵革
念農耕之苦命蠲乎徭役知儒者之寒命選於宗伯

樊噲入鴻門賦

沛中之智兮勇鵬翻舞陽侯兮威曷論冒死而嘗輕白刃
匡君而直入鴻門卮酒彘肩豈讓匹夫之饕朱輪畫轂能
扶萬乘之尊當其秦鹿無主項王赫怒誇楚將於秋鷹滅
沛公於蹇兔天地何小風雲可步海蕩山振龍驚虎懼鳳
歷誰傳鴻門晝闔湯池命酒歐劒搖環氣隆準以斯挫血
重瞳而欲殷鯢浪鯨波呀呷於斯須之際禽籠獸穿炮燭
於咫尺之間洶洶羣心雄雄壯士詣閭闔而飛步怒豺狼
而切齒僕視闔守掌窺戎壘嵩衡蓋數撮之塵溟海乃一

泓之水身輕白羽蹈烈火以非難手擘朱扉信春冰之可
履走電呀雷金樞洞開麋鹿奔而驅虎至燕雀驚而鷹隼
來愚山可徙藺柱須摧引龍躍於洪波蓼人徒爾送鴻翻
於碧落弋者何哉

闕下

雷發聲賦

以起龍驚蟄天道式空爲韻

化不可識春之倏生神不可測雷之忽鳴表陰陽之大信
發天地之希聲俄青律之未分寰區曷變俄洪音之一播
品彙須驚豈不以上綰天樞下司地紀陰之變兮將伏陽
之開兮欲起撾雲鼓雨殷南山而過北山火轂風輪震百

里而越千里浩浩闐闐神驚鬼顛冥濛而烏兔將墜動蕩
而山河欲遷須臾走電赫飛霆聯霹靂俄奔八表謂衝開
下土轟輶繼作九州疑裂破青天烈缺威催豐隆令急晴
陽照兮冰凍洗甘澤滂兮衰朽濕幾處脅韶光淑氣振折
羣芳數重呀地戶坤維驚醒百蟄燭燧洪濛掀碧空香
籠麗景翠染東風去年之積冷淒寒皆令變暖昨日之枯
株槁木盡使駢紅則知春之榮雷於春而稟德秋之落雷
於秋而授職不然者何以動於此以爲準止於彼而作式
聲之發也星辰將厯候咸移聲旣收焉蠢動與芳菲並息

駕電驅風高凌九重日兮月兮還我化天兮雲兮塗我蹤
時時而遠谷陰霾旬崩疊嶂往往而寒湫煙雨吼拔潛龍
則知雷發無遺春光自早發聲而歲歲長在光景而人人
自老不能火僭逆而霹靂妖攸攸兮天道

人生幾何賦

以歸心主朴福
履何容爲韻

葉落辭柯人生幾何六國戰而謾爲流血三神山而杳隔
鯨波任誇百斛之明珠豈延遐壽或有一卮之芳酒且共
高歌豈不以天地爲爐日星爲紀雖有聖而有智不無生
而無死生則浮萍死則流水七十戰爭如虎豹竟到烏江

三千賓客若鴛鴻難尋朱履擾擾忽忽晨雞暮鐘命寧保
今霜與露年不禁今椿與松問青天今何慘何舒拘人否
泰歎白日今東生西沒奪我顏容可惜繁華堪驚倚伏有
寒暑今促君壽有鬼神分蠹君福不覺南隣公子綠鬢改
而華髮生北里豪家昨日歌而今日哭夢幻吞侵朝浮夕
沉三光有影遣誰繫萬事無根何處尋易服猛獸難降寸
心眼看西晉之荆榛猶經白刃身屬北邙之狐兔尚惜黃
金亦何荒色嗜音雕牆竣宇君不見息夫人兮悄長默金
谷園今閭無觀香閣之羅紵未脫已別承恩春風之桃李

方開早聞移主邱壠累累金章布衣白羊青草只堪恨逐
利爭名何太非嘗聞蕭史王喬長生孰見任是秦皇漢武
不死何歸吾欲挹元酒於東溟舉嘉肴於西嶽命北帝以
指榮枯召南華而講清濁飲大道以醉平生冀陶陶而返
朴

鮫人室賦

斯室誰見伊人盡傳浩渺而洪波有象深沉而碧浪無邊
異彼鮫人處乎鯨海儲晶蓄素刮銀兔之秋光矗浪凝波
刷金鳥之畫彩露洗霜融涵虛湛空鑿戶牖以非匹飾椒

蘭而不同度木何人範環堵於琉璃地上作嬪誰氏織輕
綃于玳瑁窻中鬼瞰終無神功自偶雙闕標百尺峩嶢而
貝闕凌前萬戶列千門洞達而龍宮在後光攢琥珀千樹
花折珊瑚萬枝控巨鯉之真人方能到此泛靈槎之上客
莫入於斯電落窮陰雲閑大廈誰爲欺暗之士盡是泣珠
之者霏霏瑞彩凝成蟠螭之梁漠漠飛烟化作鴛鴦之瓦
鏡瀉齋淪波澄垢氛瓊窻而鼇頂均岫綺棟而壺中借雲
二十四里之漢宮何曾足數三十六般之僊洞未得相聞
允矣神化規模天然異質吾欲乾北海而涸南溟探驪龍

於此室

京兆府試入國知教賦

天闢區宇人尊帝王國將入於封部教先知於典章不宰
成功乃合乾坤之德無私鑒物能齊日月之光多士之操
脩六經之楷式將欲明其教必在遊於國溫柔敦厚出風
雅之咏歌比事屬詞本春秋之黜陟協彼典教諧斯禮文
廣博而樂章具有精微而易象爰分先王所以總斯御物
體彼爲君遂使足厯四門親愛之儀已覩身由萬戶民從
之義皆聞莫不周覽金湯潛量王霸審樂知政以攸類陳

詩觀風而相亞是以逢耕讓畔得先人後已之規察烏安
巢驗惡殺好生之化今吾君興帝業赫皇明以謙柔而教
蠻貊以樸素而教公卿以節儉而教百姓以農耕而教五
兵自然八方走響六合飛聲豈俟入乎閭闕方能知彼規
程其或跋扈未殲陸梁未向可使拜天闕而俯聽趨帝闈
而引望俾其退而補過警干羽之舞階進以盡忠報聖明
之在上士有負書劍出林巒謁九門而教化斯仰瞻百辟
而威儀可觀則知不上泰山豈覺寰區之大不浮東海寧
知溟渤之寬敢不廣義路懷忠甲開閭闔以聽聲詩賀仁

霑而恩洽

澗底松賦

碧澗千仞青松幾年豈天生之有異蓋地勢以居偏挺操
彌貞雖厄巖巒之下掄材倘鑒合居樗櫟之前則知植物
之近不可用而或用生物之遠其可貢而誰貢伊彼良木
何慙其青竹成龍工未我求且伴其高梧宿鳳翠鎖山椒
心凌碧霄生風而虎豹吟嘯拂衣而龍蛇動搖安得伴磊
磊之石因離離者苗奚三公之夢猶阻豈萬乘之封尚遙
何殊孔明之先主未迎空懷良策呂望之文王非獵不到

終朝今則希匠斤採溪壑如拔之於高岸邃谷可營之於
帝宮仙閣澗底松兮才不才候般輸之所度

止戈爲武賦

以和衆安人是
爲武德爲韻

書契天設文明日新將究止戈之義式彰爲武之仁足還
太素壽我生靈志肅三軍欲致理而臻乎至理論歸八法
見古人而教以今人昔者楚莊薄諸晉國小臣請築乎京
觀厥王乃陳乎道德謂臨戎制敵勝不在乎干戈示子傳
孫事宜歸於翰墨且武也者戰而不陣師惟在和考其字
以因明所自止其戈而焉用其戈願劍戟而器於農耕賢

哉若彼問軍旅而對以俎豆聖也如何矧乎伏羲畫卦以窮微蒼頡造書而允中能會意以無怠實臨文而可諷下破山而加點理絕乘危上擬成以無人誠爲動衆以五兵爲武者非武之資合兩字爲武者是武之奇當用究言其不用有爲詎及於無爲鳥跡斯驗人情可窺亦胄普疑而明焉其儀不昧秋懸心而愁矣厥義咸知是宜遵史籀之文贊昇平之主兩階屢舞以稱聖七德交修而曰武亦何異威而不猛宥刑而夏楚寧施捨之而藏得象而筌蹄奚覩今我后洞窮經之旨知爲君之難功不宰而八蠻自服

書同文而萬國咸安列聖摧凶我則懷遠而柔邇前王伐
罪我則去殺而勝殘故得文物重新妖氛自弭廬人之百
鍊寧問呂望之六韜可委士有偶明試而賦上獲贊皇風
而之是缺

御溝水賦

以月苑花隄遙
濟東渭爲韻

陸海之中昆明以東御爲溝而有自溝注水以無窮縈紫
閣之千峰清辭玉洞瀉銀河之一派冷入瑰宮我西都也
地正三秦天連五緯不知此水之出但見斯溝之貴旣非
減灞以分漦又匪疏涇而鑿渭是何飛下雲霓公高走低

潺湲乎元豹岡北繚繞乎靈龜岸西豈因水伯穿地維通
來玉甃必是神龍爲天子吐灌金隄上遶蓬瀛中侔溟渤
涵暮景於瓊殿倒晴光於絳闕色入天池遠不遠兩岸垂
楊聲喧金屋眠不眠六宮明月迴瀉岩堯高連碧霄朝宗
而鳳沼將近習坎而龍宮不遙漱今古之雄都千門水鏡
截東西之大道幾處虹橋豈不以決泄年長泉源地遠青
蕪濯翠兮宵雨霽紅杏飄英兮春日晚堪歌聖代浮通其
德澤恩波莫問當時流破其秦宮漢苑香徹天涯先來帝
家重輪而瑞蘸紅日五色而光搖彩霞時時而翡翠隨波

飛穿禁柳往往而鴛鴦逐浪銜出宮花其或赫日流金輿
人望歲咸憂地利以將失願假天波而下濟分紫禁以餘
潤作黔黎之大惠則禹濬川也不爲已而爲人農擊壤焉
不荷天而荷帝玉堂金殿兮知不知敢進芻蕘於此際

白衣入翰林賦

以玉闕承恩速
臣名德爲韻

天寶詞人李謫仙兮誰能論出白屋而謁明主脫布衣而
爲侍臣唯誇其麗藻清辭將承寵渥不待乎腰金拖紫便
掌絲綸則知人不英無以動乎邦國主不聖無以振乎儒
墨二美相契于齡所刻愚聞白之始也宅岷峩鑱羽翼待

風雲伸道德金門玉殿兮掛魂夢乾象坤儀兮羅胃臆雲
情鶴態歌劍嶺之秋光月夜煙朝釣錦江之春色俄而入
洛遊京懷珠袖瓊塵中獨步酒肆陶情烏棲曲兮金石奏
蜀道難兮神鬼驚小隱乎林壑大隱乎帝城賀祕監兮薦
英秀韓荊州兮誇盛名於是鳳詔搜揚洪名振發長裾似
雪兮出圭竇縫掖如霜兮入禁闕冰姿玉貌別巢許之林
巒醉眼慵心豁唐虞之日月走騎飛軒街談巷言青雲得
路兮肌骨換白日昇天兮朝市喧縞素麻衣朝雜庶人之
伍龍攄虎變夕蒙天子之恩彩筆摛文彤庭步玉碧山之

傲逸猶在紫禁之繁華乍束往往而紅筵對酒宦者傳觴
時時而後殿操麻宮娥捧燭夫如是則才德須憑簪纓自
勝起布素之卑位陟蓬瀛之上層白鳳辭高青帝之春華
不若金鸞寵異皇王之密旨先承豈不以天假良時神資
景福草元之客兮進何晚題柱之人兮望何速曷若我不
忤不求脫布衣而食天祿

山暝孤猿吟賦

以吟起殘暉客
顏悄惻爲韻

白日光沉青山影深伊萬籟以俱寂有孤猿而忽吟隔樹
初傳切切而來當暮景隨風更遠聲聲而飛下煙岑當其

疊嶂凌空微陽送晷擁條之響俄發命侶之音迴起揚清
引濁如含莊舄之愁吐怨流哀不爲養由之矢增悵望兮
動辛酸建陽小兮凝晚寒踰絕壑兮度鳴湍悲風颯兮零
雨殘澗草萋綠谿花隕丹此處則臨岸爰笑攀蘿永嘆幾
多之去棹來舟驚迷島嶼無限之離魂別緒飛掛林巒感
東西而怨行役三峽山光峭空碧冒懸流而躋絕壁苦露
結兮寒烟白望帝冤魂萋宏悵魄此處則抱樹驚曉號風
向夕峨嵋高兮劍峯綠愁殺巴人錦江暮兮筇竹秋悲纏
楚客山隱隱水渺渺孤猿吟兮何悄悄野駭麋鹿林棲羣

鳥往往於松蘿谷口嘯得煙昏時時向薛荔峯前啼摧月
皎斷續相催聲長韻微千林之紅葉雖墮萬嶺之愁雲不
飛嘹嘹噉噉休未休如迎靜夜歷歷啾啾起又起似送殘
暉足令掩耳傍徨吞聲太息何彼韻之增起欲我聽之暫
息則知邊城鴈兮高柳蟬未若聽吟猿而慘惻

歌賦

以氏信命事聲
辭有傷爲韻

楚襄王以魂夢初驚高堂賦成因命酒以將飲遂聽歌而
適情於時白雪音厲陽春調清命宋玉之雄藻賦貫珠之
妙聲玉乃避席而起請陳其志曰臣聞樂以象其聲歌以

陳其事樂也者六律不得不正歌也者五音不得不備是
宮不亂而爲君商不亂而爲臣徵不亂以爲事角不亂以
爲民羽不亂以爲物五音備以爲真如此則天地同和陰
陽代順一謳而王道敦化再唱而民心端信逆氣亡象姦
聲匿韻三光普照而不昧萬物以類而相振然後君臣序
而父子親五音隆而四瀆濬斯爲治世之音可同休於堯
舜至如宮之亂兮君荒商之亂兮臣亡徵之亂兮事失角
之亂兮民傷羽之亂兮物匱五音怪而改常如此則寒暑
失時邦家自咎唱予而毒慘諸夏和汝則災生九有鬼神

不享社稷非久乾坤之紀綱潛紊麟鳳之禎祥莫偶然後
李尋皎而夷狄驕兵革飛而戎車走斯爲亡國之音可同
風於桀紂其爲音也不在乎玉管朱絲其爲歌也不在乎
燕娥趙姬隔巴濮採聲詩樂府陶匏自本黃鍾之律姑蘇
麋鹿誰聽白苧之辭王曰斯賦之盛珠輝玉映可以發昏
蒙佐明聖爲前古之楷式作後來之龜鏡非寡人之所知
敢不承天之命

毛遂請備行賦

以才高德修明
決失人爲韻

上客縱橫毛公不爭旣藏器以待用遂陳辭而請行幾載

和光利刃之深機但祕一朝效勇囊錐之奧義斯明當其
久陟朱門長謙末德昆吾韜切玉之鋒丹穴戢凌雲之翼
懷才抱器何趙國之足匡日往月來笑平原之未識俄而
羽檄交催秦兵四來邂逅而君臣就辱逡巡而家國傾摧
平原乃入楚求救招賢共裁列簪纓而議也簡文武以行
哉恨同心而同德求其濫者何貴耳而賤目棄我全才於
是奮發雄辭敷求大志今行侶以將闕輒愚夫而敢備當
時維繫騰驤之步誰知今日彌縫穎脫之鋒可試然後得
繼英豪彌輕爾曹瞻鄢郢以神勵出邯鄲而器高明明特

立之試斯期必克蠢蠢同行之輩應爲徒勞及其見楚國之君說秦兵之孽自旭旦以將論至日中而未決遂乃足玉砌以心動手霜戈而氣折儻一夫之有惜不肯扶危則五步之非遙立當流血故得楚國君臣來言盡力師旅大加於東趙干戈日卻於西秦名遂功成辱殺三千之客解紛排難慙生十九之人則知士也者不可以貧欺馬也者不可以瘦失何待客以無鑒幾遺賢於此日伊毛生也重於九鼎之功非狗盜雞鳴之匹

江令歸金陵賦

陳祚以世六十年毒奢淫而忘險難運去而蠻奴北面時
來而江總西還傷心而昨是今非三台祿位觸目而人非
物在一片江山初其君但期天闕國無盤石詩成而詠雪

嘲風酒惑而迷魂蕩魄昌言直諫朝朝而惟列七人列蠟
燒蘭夜夜而長畱十客一旦雷卷隋軍驚風坐聞龍顏入
井以魚伏鳳閣離居而豆分於是嗟覆轍嘆浮雲拋建業
之山河來朝魏闕捧金陵之日月送與隋文斯人以鳥戀
南巢萍流遠道還吳而喜遂歸骨入境而鞠爲茂草心感
存沒汨橫襟抱慘淡而煙迷遠渡杏浦波生蕭條而葉散

悲風金檀樹老廢壘蕪城行行復行霜凌夜葉壯心碎屬
國窮歸華髮生中臺將黃閣皆空荀池鳳去甲第與朱軒
不見謝墅狐鳴茂苑濤聲秦淮月色終史溥之前夢嘆東
昏之舊國雖信天命宜慙衮職豈不聞三秦甲馬已過乎
淝水之陽二謝韜鈴克殄於壽山之北則知翌輔者在乎
外撫四夷中扶萬機建其策而安邊卻敵致其君而端冕
垂衣安得三閤天高但縱殷辛之酒萬兵雲集未知蘧瑗
之非果令位失家亡君移國徙前恩不及於民庶晚歲卻
還於舊里金陵旺氣索然空唯見碧

闕字

涵淥水

隱居以求其志賦

以得志明時賢
人野悅爲韻

小人之見兮見以求利大人之隱兮隱以求志索其居而
弃世捐俗達其義而伺時藏器莫不濯足溪影掛冠山翠
不游徑而得康莊不出戶而窮天上自英君傍惟哲人
偕侔鳳而藏羽盡規龍以蟄鱗恭聞舜雷澤而遯跡漢芒
碭以潛身板築胥靡熊羆渭濱芝歌商嶺以誰聽瓢掛箕
山而曷隣雷澤之志兮志於聖也芒碭之志兮志於天下
得之則宅乎寰海求之必通乎崑野所以賓四門而總百
揆揖遜皇王斬白帝而烹楚君巍巍宋社渭濱之志兮國

傳主師胥靡之志兮匡君佐時然後神契畋天開夢思
三十八代之承桃韜鈴自有五十六年之救旱霖雨常滋
商嶺之志兮以全真箕山之志兮於高節逃秦輔漢以無
失友帝朋巢而自悅蓋聞析心以智光乎聖哲志也者寂
與心通隱也者憑乎志成并於心兮故可以通造化貫幽
明成於隱兮或可君兆庶爵公卿志不立兮吾息則隱志
苟通兮吾道斯行君不見西棘乘風上擊雲霓之路蟠泥
得水高驤天漢之程奔塵競路以彌惑絕跡深局而有得
惑之者惑於澆濁得之者得於幽默虱捫西華以持衡龍

卧南陽而輔國珞珞雲林之士方器崑廊攸攸市井之徒
誰懷道德亦由擇梁棟於闕一山索珠璣而在淵採綠蕙
於樊圃刈嘉禾於甫田其道要其理元嘗聞降蒲輪於草
澤天子求賢

朱雲請斬馬劒賦

以越寫嘉詞辱
君鋒刃爲韻

朱公以紫殿之下明誠洞寫仗心劒而上請神劒非斬馬
而不除害馬則知堂堂者多謬謬者寡是何抗萬乘而不
失覺千官而盡啞昔張禹以軒冕巍我爲王者師攀龍附
鳳於炎漢陰慘陽舒於片詞不畏神怒惟專詭隨中於人

今若醜若蠱潰於物而如膏如脂合彈者誰是簪筆合諍者何人措辭雲則早奮忠貞誓邪曲有刃當斬對君必辱於時開九門兮左日右月朝百揆兮鏘金佩玉鴛鴦方駢雲龍乍矚於是演折角之宏辨趨逆鱗而上觸乃曰不諫非臣容姦匪君臣聞上有厥劒利無與羣不爭乎刺鍾切玉不並乎倚天扶雲蓋是吹大宛之毛剗渥洼之骨君幸頒賜臣非僭越旣將伸明代之朝命斷佞臣於大闕今太傅以抗傲三公昏蒙九重陷君子於虬龍化犬進小人則蛇虺成龍固請刑於廣肆血被鉅鋒帝忽色怒雲乃氣衝

死爲屍諫生寧面從將軍匡

闕

以稽首天子逡巡而改容

義匪伏蒲志大而諸侯瑣瑣芳流折檻名高而四海喁喁
胡不淬辭爲鋒礪志爲刃拂訛濫以將退麾賢良而與進
何必趨劔闕將求竟伊人而莫擯設若寶鍔將授昌言是
嘉又何以見仲尼之紀綱誅正卯之姦邪則王莽之偷宗
社又安得聞耶

義漿得玉賦

以仁德達天錫
奇如已爲韻

義漿殊賤玉唯至珍有楊元之立德果陰陽以酬仁豈非
惻隱天資不爲恩而自感明誠日皎不望報而自臻所以

悲其遠道長征窮途未達感朔風而千里遐阻爍火景而
四郊空闊堪嗟其自北自南每想其再飢再渴一瓢漿水
能頒歧路之間數仞朱門誰顧風塵之末於是博施無偏
壺漿湛然清若元酒甘如醴泉旣日日以將日復年年而
一年注以何窮問東流於巨海浸而無怠瞻北斗於遼天
莫不椒桂飄香雲霞豔色行人欣塞路之美戰士豁鹽梅
之惑無冬無夏不酌水以酌心暮往朝來非飲漿而飲德
寒暑相移精神罔虧人不報而神代報世未知而天已知
俄而垂感應降瑰奇被褐懷來五飲之家獲寶盈疇種罷

連城之價驚時寧異瑞頒俄同珪錫凝雪彩於三逕貫虹
光於四壁則知矯其施者恩絕竊其珍者禍積嗟來致食
寧招蒙袂之人再獻爲心謾剖輝山之石且夫濟人渴者
尚報非虛薦人善者厥報何如渴之濟兮小恩小惠善之
報兮開慘開舒可以慶其邦國高彼門閭克裔於簪纓爵
祿豈惟瓊玖璠璣事在何人道歸君子陰其德而德於心
陽其報而報於已昭然貽厥於孫謀不並義漿之理

勾踐進西施賦

以紅顏豔色返
以昏哉爲韻

惑人之心兮惟巧惟僭破人之國兮以妖以豔當勾踐之

密謀進西施而果驗昔者二國相吞陵卑恃尊殊不知卑則自亡而固存尊則爲明而反昏烏喙年年誓啄夫差之肉稽山日日拜聽范蠡之言言曰伍員之賢東吳之德伯嚭之佞東吳之賊德之盛兮越可憂賊之興兮吳可殛臣以夙夜而計機謀偶得欲狂敵國之君須中傾城之色待其聲色內伐君臣外惑自然紂姐已以亡宗晉驪姬而亂國今苧蘿之山越水之灣恐是神仙之化忽生桃李之顏波淺丹臉鴉深綠鬟顰翠黛兮慘難效浣輕紗兮妖且閑楊柳羞弱芙蓉恥殷可以變柳惠於貞莊之際悅荆王於

魂夢之間臣請進焉王今何以王乃豁若而喜矍然而起
曰此蓋神假卿之奇畫天雪越之前恥乃命寶馬騰龍香
車碾風迎織女於銀漢聘姮娥於月宮炫耀雲外喧闐洞
中妝成而瑞玉凝彩服麗而朝霞翦紅昨宵猶賤今晨不
同寧期大國之君流恩下及堪恨鄰家之婦謂妾常窮曉
別越溪暮歸吳苑越慮計失吳嫌進晚歌一聲兮君魄醉
笑百媚兮君心卷坐令佞口因珠翠以興言立遣謀臣棄
洪濤而不返勾踐乃走電驅雷星馳箭催投醪而士卒皆
醉膏膽而胸襟洞開虎噬骨碎山崩卵摧楚腰衛鬢化爲

鬼鳳閣龍樓燒作灰於是命屠蘇之酒上姑蘇之臺伊霸業以俄去我英風而聿來嗚呼殺忠賢而受佳麗欲弗敗其難哉

斬蛇劍賦

以仗劍斬蛇金鉞水鍰爲韻

磨霜礪雪兮熒煌錯落伊逐鹿之英聖兮有斬蛇之鋒鍰蓋以麾正乾坤劃分善惡楚國之姦雄徒爾烹若窮鱗常山之首尾胡爲斷如朽索斯劍也上應君臨舒陽慘陰有其道則威若身兮靈若心無其道則鉛其刃兮木其鐔惟上德之在火協紅爐之躍金莫不龍活三尺霆飛半尋是

何靈貺之異天啟之始而乃振戎衣授秋水匣辭乎豐沛
之邑腰入乎崤函之里日月方暝雲雷未起有大蟒以橫
路礙潛龍之舉趾於是上較天意下量地紀視銛鋒而何
斯違斯擊怪物而宛其死矣然後挫七雄削多壘豈惟仗
之翦長蛇而戮封豕蓋將提之令諸侯而禪天子得非秦
毒之奢變作長蛇漢德之儉化爲神劍奢以儉陷蛇以劍
斬道在晦而須顯事有增而必減果聞哭白帝之亡符赤
帝之昌雖行大義亦假雄鉞莫不龜文龍藻玉鏤金裝世
亂將用時清則藏十二年兮加我淬七十陣兮摧爾剛空

山吞象之鱗豈鉞蓮鏹大澤銜珠之血不汚星光然後厯興亡繼得喪漢之滅兮魏之受魏之衰兮晉之仗晉火起兮高飛豈混烟煤之狀

過驪山賦

以陵摧國歿永紀窮塵爲韻

六國血於秦秦皇還化塵塵驚而爲楚爲漢路在而今人古人但見愁雲黯慘疊嶂嶙峋時遷而金石非固地改而荆榛旋新愚聞周衰則避債登臺秦暴則焚書建國貴螻蟻於人命法豺狼於帝德兩曜昏翳九圍傾側扶桑幾里我鞭石以期通溟海幾重我驅山而要塞慘慘元穹嗷嗷

七雄三農百穀以休務淬鐵磨金而獻功九州病萬室空
韓趙魏以交滅楚燕齊而坐窮家有子兮誰得孝國有臣
兮孰効忠九野分將焉作兆民之主諸侯吞盡方行天子
之風星隕九霄城長萬里血染草木肉肥蛇豕將欲手挂
天刃足挑地紀拙虞舜而短唐堯汚殷辛而長夏癸禍從
殃催川搖嶽摧金陵之王氣頓起蓬島之宮娥不來黔首
求主蒼昊降災天漢之龍髯倏斷沙邱之鮑臭誰猜魑魅
諸夏腥羶九垓於是宅彼岡巒兆斯陵闕猶驅六宮以殉
葬豈言蔓草之縈骨嫌示儉於當時更窮奢於旣歿融銀

液雪疏下地之江河帖玉懸珠皎窮泉之日月
嶸嶸層層不騫不崩斯高之喉舌方滑劉項之雲
雷忽興軼道一朝鹽獻漢家之主驪山三月火
燒秦帝之陵今則草接平原烟蒙翠嶺想秦史
以神竦弔秦陵而恨永華清宮觀鎖雲霓作皇
唐之勝景

柳璨

璨字炤之公綽族孫顏蕘判史館引爲直學士
遷左拾遺擢翰林學士尋以諫議大夫同中書門
下平章事進中書侍郎判戶部封河東縣男朱全
忠加九錫璨進拜司空爲

冊禮使已爲全忠所惡除名流崖州斬之

移置元元觀奏

前使裴樞充宮使日權奏請元元觀改爲太清觀又別奏在京宏道觀爲太清宮至今未有制置伏以今年十月九日陛下親事郊禮先謁聖祖廟宏道觀旣未修葺元元觀又在北山若車馬出城禮非便穩今欲只畱北邨山老君廟一所其元元觀請拆入都城於清化坊內建置太微宮則車駕行事得禮

請黜司空圖李敬義奏

近年浮薄相扇趨競成風乃有卧邀軒冕視王爵如土梗
者司空圖李敬義三度除官養望不至咸宜屏黜以勸事
君者

欽定全唐文卷八百三十一目錄

新文藝出版社藏書

錢珣

冊太原節度使守太師兼中書令晉王制

授裴廷裕左散騎常侍制

授祕書少監賜紫盧光啟守中書舍人制

授祠部郎中知制誥賜緋王鉅守中書舍人制

授考功員外郎賜緋魚王鉅駕部員外郎知制誥

制

授前合州刺史顏蕘禮部郎中殿中侍郎御史李

德璘右補闕監察御史鄭渥右補闕等制

授前起居舍人韋序禮部員外郎前櫟陽縣尉韋
溪左拾遺等制

授前起居舍人崔居邈庫部員外郎前好畤縣尉
充集賢修撰獨孤建守左拾遺等制

授監察御史李漸左補闕前著作佐郎張道右拾
遺制

授司勳郎中兼侍御史知雜事賜緋魚韓偓本官
充翰林學士制

授右司郎中張元晏翰林學士制

授劉崇望吏部尚書制

授陸宸兵部尚書制

授趙昌翰考功郎中制

授京畿制置使判官兼中丞賜紫李巨川兵部郎

中制

授司封員外郎賜緋崔貽孫守兵部員外郎判戶

部案制

授前兵部侍郎薛昭緯御史中丞制

授兵部郎中鄭黃庭兼侍御史知雜事制

授禮部員外郎集賢院直學士賜紫金魚袋王搏

刑部郎中兼御史知雜事制

授宗正卿嗣鄭王遜大理卿李克助宗正卿等制

授前虔王傅賜紫韋師貞光祿卿制

授前鹽鐵淄青催勘使檢校左散騎常侍王鄴衛

尉卿制

授鴻臚少卿賜紫賈渭太僕卿前太常丞吳方太

原少尹制

授棣王府司馬崔就太常少卿賜紫制

授前左贊德任蕖將作少監制

授戶部巡官祕書省校書郎楊玢武功縣尉充集
賢校理制

授太僕卿賜紫李涪國子祭酒制

授左衛上將軍滿存特進檢校司徒仍復長城郡

開國公食邑三千戶制

授寧遠軍節度使蓋寓左武衛上將軍制

授前左千牛衛大將軍李鎔右驍衛大將軍右千

牛將軍江繼美加兼檢校右散騎常侍制

欽定全唐文卷八百三十一

錢珣

珣字瑞文徽之子起之孫唐末官知制誥進中書舍人梁開平初貶撫州司馬卒

冊太原節度使守太師兼中書令晉王制

維年月日皇帝若曰我國家作法於仁達情以禮振典謨而誕告載名器以公行何嘗不重懷多難豐報丕烈矧乃圖先廟社允集王功誠動日星必承天祐王功建而臣節盡天祐至而君命宜昔經武爲師賜履荷宗周之寵今在

金史卷之三十一
邦稱傑剖符受全楚之封英偉自侔古今同典當勳而舉
非我有私具官某博厚自持堅剛不惑抱公能察守貴必
恭騫然飛行之風增彼懦夫之氣而先臣奇備間代雄材
圮上視書太公來受雲中饗士李牧復生出鞏洛以行師
轉淮沂而殄寇倬哉茂績興在後昆爾乃開國象賢勤王
繼志諒因心而無改敬遺體以有爲英蕩旣臨文茵是籍
率乎羣后自絕他時控彼諸戎不連右臂日者毆除大盜
爰復神州焜耀元功載書盟府以啟紹開之慶是資戡定
之勞而伏念先朝薦罹否運朱攷則罪極邊伯李煜則親

非子頽肆其樹置之謀黷我纘承之統是以奮飛長檄條
列本枝遏濟惡之亂流披崇姦之僭黨夷兇有力賀福無
違近則王行瑜驕以叛恩顛將敗族爾乃先知塗地每恥
同天顧刑憲之可加抗封章而不避潛思歆血憤欲寢皮
而逆豎犯關興兵朕方奔車出次始懷愧懼未暇翦除行
瑜轉禍終迷于誅罔畏螫手而不能自斷噬臍而誰復與
論爾聞難成憂直躬決策衝冠激怒折箠興言龔行已勵
於五申急召寧煩於二節武剛夙駕屈產跳驅存誠而有
禮則安舉事而不疑何卜乃聲鐘鼓乃合諸侯畱屯雖在

於郊圻宿飽匪勞於漕輓爾臨渭曲深溝而親拒寇讐我
復鎬京高枕而無虞侵軼然後進攻外壘盡復強軍支翦
喉舂如麻滿野或反袂以來獻俾噍類之不遺元惡出奔
勢窮就戮廓清而罷約束尚嚴受降兼讓於使臣擇帥請
行於國命一如紀律以報會盟天贊孔昭主憂盡釋始未
見若之面今盡見若之心神聽斯言衆圖是賞畫雲臺而
莫顯篆樂石而非多師氏建官位惟極致春秋列國晉實
大名典重而近古不行勲盛而予衷何愛廣廷備物且授
詞臣法座臨軒式光體命今致遣中書舍人薛廷珪冊爾

爲太師兼中書令仍進封晉王於戲獨立王功忠乃善藏之府永膺天祐敬惟能保之軀則必慶於而家樂於而土戒之勿息與國無窮

授裴廷裕左散騎常侍制

勅具官裴廷裕國之用材在乎稱職況詞臣之任君命所垂苟詳慎之有乖繫事機而實重旣聞輿論得以移官以爾學植素深文鋒甚銳自居侍從亦謂勤勞乃推游刃之功庶叶匿瑕之道未能降秩且復立朝珥貂猶假於寵光夾乘仍親於左右將存大體以息多言可依前件

授祕書少監賜紫盧光啟守中書舍人制

勅西省設官之重實代吾言故修禁之章漏泄居其首而稽緩次之受選者率用靖默專敏之士然後爲得具官盧光啟勵精不怠處默有倫定志而靜專其謀好古而敏求其要總是四善謹於一心則攻學典文嘗試之於禁闥矣能於散地自安素風不去乃資公論復典訓辭夫入官惟勤執事惟敬苟視禁以無犯則立身而有章行之克終利亦焉往可依前件

授祠部郎中知制誥賜緋王鉅守中書舍人制

勅遷不欲速則人將競遷而不安其職也掌誥故事多用
外郎歲滿而升乃正郎位歲又滿始得其秩所以持重官
次展張辭業有毛羽者不亦樂於翱翔乎具官王鉅敏於
內而秀於外其發也爲文章棲於禁垣奮以健筆若夫規
格罔有輕浮試之三年未嘗亂日且聞講學必務本根今
掌誥再遷一如故事論諸游官於爾甚優兼佩金章俾光
飛步自茲而往厥路彌高敬而行之何患不到可依前件
授考功員外郎賜緋魚王鉅駕部員外郎知制誥

制

勅某官某夫舉典申命以進退在位之士而指其否臧兼
儆百職者本乎聖人之法言也法言之不爲浮言而已知
言之士過實必羞因使出辭當能近法鉅積中有美欲昧
而彰永惟季父令名常恐所承不似百川學海進則至焉
吾欲激而成之是以擢居禁省往司明誥罔畔法言至不
漏不踰茲爲能矣可依前件

授前合州刺史顏蕘禮部郎中殿中侍郎御史李

德璘右補闕監察御史鄭渥右補闕等制

勅具官顏蕘等昔太師魯公拘在寇廷渠魁有危迫之問

對以諸侯朝覲之禮奮發直言不屈端凝守正而歿理命之戒家廟爲先賢哉鉅人可謂忠而知禮矣今堯行高學茂洪緒有承因太師之所爲遂以禮曹郎命爾用昭遺德且勉令修德璘合矩中規擅髦彥之稱渥端居慎守積監視之勞擢爲諫臣實就近列使吾聞過繫爾當官無或面從以墜其職可依前件

授前起居舍人韋序禮部員外郎前櫟陽縣尉韋

溪左拾遺等制

勅具官韋序等近朝賢相名卿以貞重簡潔益大其門者

序則承之故華選陟居昭其嗣也爾復稟粹揚清不洿不
屈播在公論使我思聞其或風法名家鉅宗稍替溪則飾
身而進志欲與爲一羅等疑謨久爲羈滯仍嘉好學俾列
近班夫賤奏所司典章誠重而昭嗣之選大不在辭廷諍
之臣惟直是舉欲與之志官以道彰華選近班各詳茲訓
可依前件

授前起居舍人崔居邈庫部員外郎前好畤縣尉

充集賢修撰獨孤建

一作遲

守左拾遺等制

勅具官崔居邈等郎署之選優諫臣之選重必用門子以

清朝倫居邈愿而自求以守名卿之嗣建學而不倦能從長者之言聞其退居皆已甚久苟無甄擢何爲搜揚可依前件

授監察御史李漸左補闕前著作佐郎張道右拾

遺制

勅具官李漸等朕常推感寤之意闢艱難之途實務塞違用昭致理爾等或奕代之盛風聲有傳強以自圖守若不墜或從學之道外直固在中慎無揣我之情然後舉職從諫則聖吾詎無心於此哉可依前件

授司勳郎中兼侍御史知雜事賜緋魚韓偓本官

充翰林學士制

勅執事近臣上無不可敬時

一作持

文墨而分禁職者又加

等焉蓋咨訪之勤密期宏益訓詞之暇必進語言思引君
當道之心乃多士以寧之本則授禁職之選被加等之私
安可徒任筆端然後爲得具官韓偓動人之行率性自強
慎獨不渝考祥甚遠資以講學見於文章惟是求己之多
播於羣譽矣朕初嗣丕業擢升諫曹繼陳言辭罔不摩切
雖公賞曾光於赤紙而直誠尚記於皁囊愈聞勵修宜列

左右故命爾之誥以詩人孟子之說爲端者茲不有賴於侍從乎可依前件

授右司郎中張元晏翰林學士制

勅文也者性之表也積中爲性發外爲文冠乎妙用之先繫彼化成之大而文之雅奧本具典謨所以教誥萬方昭明百度代我而作求之必公具官張元晏嘗聞薦紳論者多以爾儒行踐修出言之章能顧於是聚問之學斯不爲人乃知發外之文實自積中之性吾越在闕輔不遑燕居大盜未屠蒸人且墜謂引過則責躬必至謂伐叛則用武

金史卷之三十一
方勞爾其據體會機翦煩總要而復念害成於垂誠安假
寵以自圖勿使詞臣不當朝選可依前件

授劉崇望吏部尚書制

勅朕常考易象否泰之說詩人雨雪之作知君子消長之
際繫王者政理之端矧乃大宥已行衆累皆滌非其罪者
敬以命之具官劉崇望吉德在躬明誠格物辭倡寡和自
合正聲昭兆先知宜居前列朕初繼大統方求國楨侍從
之臣論思在爾代言之下宏道良多察其寬裕之姿授以
弼諧之任恢張大體師法碩人以掩細過爲所能以觀故

家又能樹立本根嗣守風法爲士之道自求必聞故朝缺
美官人思公舉今丞相以版賦之重用爾爲佐理之才更
遷右曹往事吾相無謂司貨籍者近乎俗吏而忽於躬親
使滋其煩弊也可依前件

授前兵部侍郎薛昭緯御史中丞制

勅國家之設公器也君將揭而與之者必問於朝皆曰可
與則徇公況御史中丞持天下所共之法等乎庶尹重有
加焉乃詔名卿來承俊選具官薛昭緯吾閱元和遺事嘉
爾祖執憲之能軌躅可尋風聲自在美延後嗣克奉貽謀

爾又厯落開懷精明照物好讓不惑寡過自強出典誥而理勝辭豐第甲乙而以文兼行且屬多梗使於列藩與諸侯言繫安危事自肺腸而到社稷激意氣而誘公忠選無虛褒言有清論皆入吾耳盡知乃心宜正衣冠立爲繩準將分厥職惟聽茲言夫太剛太柔不折則廢作之可久必在居中爾當率寮屬以講求振綱條而審固與其就名而生事未若審實以業官勉思勤行無害有益可依前件

授兵部郎中鄭黃庭兼侍御史知雜事制

勅具官鄭黃庭法者治之具也以人就之則得其所理矣

而執法之吏剛失入虐柔失入懦有善執者惟居其中今御史中丞歸昌以贊貳之闕推擇斯難舉爾之書稱善頗至亦聞爾端肅詳慎能理其身移之當官信可陳力夫理之不勝吏實相循處剛與柔期於無失審固在已遵行有章克念居中斯爲善執可依前件

授禮部員外郎集賢院直學士賜紫金魚袋王搏
刑部郎中兼御史知雜事制

勅御史中丞光逢以望執憲縉紳間咸觀其初故選薦府僚審而後定以爾學文惟博藏器則深正道甚夷有進不

競其守則峻其用必通斯可正秋曹郎率白簡吏貳綱紀之服執而整墮矣古皇之庭實生屈軼安得今之服冕不若其古者之爲草乎官有舊章爾當明舉可依前件

授宗正卿嗣鄭王遜大理卿李克助宗正卿等制勅九卿間重而顯者大宗正卿與廷尉實次奉常焉易官而處惟典之章具官遜等皆吾屬之楨幹也而又荷出相戟之門遜繼分郡符必聞其政久厯庶位咸稱有材克助承忠孝之家踐修罔墜多所該練揚於縉紳今載葺京師敬先宗廟資乎集事速以成功而方備法官是宜改秩往

趨急務更在厲精伏念旬時獄可知也我有具律遜其盡心可依前件

授前虔王傅賜紫韋師貞光祿卿制

勅具官韋師貞國朝考課之法有三善者升上下籍師貞強仕之歲繼爲字養糾率之官三善之名四書於籍校諸能事不亦多乎歷年且深爲吏斯得慰茲班白宜有陟遷夫辨酒必良視牲不瘠祭祀之事繫爾所司往爲列卿勉戒羣吏可依前件

授前鹽鐵淄青催勘使檢校左散騎常侍王鄴衛

尉卿制

勅具官王鄴等稱職之吏無所陟明則陳力者之志怠矣
爾自居官次必公爲先若恥告勞但思責實頃者乘諸輶
傳使彼海濱善徵權酷之名允集鹹醯之利往不廢命還
可程功是用進爾於朝且升卿列宜奉警巡之事如專行
役之心克念不渝後寵當至可依前件

授鴻臚少卿賜紫賈渭太僕卿前太常丞吳方太

原少尹制

勅具官賈渭等渭比以學文通經之勤而不得志於壯歲

東帶入仕今至九卿紱冕旣崇光陰云晚詔之就列以慰其心方吏術甚長免官仍久暮齒已踰於月制下僚尚歎於陸沉置之不遷君道何在往作亞尹錫之金章亦有以嘉於老者矣可依前件

授棣王府司馬崔就太常少卿賜紫制

勅暢中發外以應天地之和在夫樂而六樂雅司於奉常絃工磬師存者尚習具官崔就負足用之學表之以能文思有畔之農施之於善政失爵之累無機則然乃非敗名人亦觀過一眚之黜數歲方還言念常情得無所鬱遂以

奉常之亞命服之朝欲爾聽六樂之和以平其氣茲爲君
道當識予心馭貴之崇亦惟其舊可依前件

授前左贊德任藻將作少監制

勅具官任藻丞相進人之請吾嘗觀其所陳或舉淹滯或
稱才用有一於此未嘗不行今言爾在公實踰四紀同塗
之吏達者固多立事之心老而不已俾越下僚之次以寬
暮齒之憂可依前件

授戶部巡官祕書省校書郎楊玠武功縣尉充集

賢校理制

勅具官楊玠士子由科而進得爲館殿吏者俯視華資如
拾地芥然而道不益固名不益彰則朝之華資其可俯視
而拾之哉玠質秀氣實自立頗強窺其所爲誠在於道固
名彰之本也今旣列書殿仍懷令圖奚患華資不能俯拾
可依前件

授太僕卿賜紫李涪國子祭酒制

勅右武以來國子失教聖域何遠儒風寢衰今朕考元龜
備法駕言旋京師有日矣姑欲開六學之署以教諸生而
張吾理道之本思得通四術者以莅厥職具官李涪以爾

金史卷之三十一
受爵素高去朝斯久奉車親重乃以太僕命之宗籍宿儒
時謂非稱擢居雅秩幸得其人以爾蘊學之優當吾選求
之要勉來分職昭我用才可依前件

授左衛上將軍滿存特進檢校司徒仍復長城郡

開國公食邑三千戶制

勅昔孟明視荀林父之爲將也獲罪於二君或敗以見囚
或歸而請死彼秦穆晉景之爲君卒能宥而復用朕雖涼
德寧昧於諸侯之霸者哉具官滿存頃列將壇頗懷臣節
且聞禁暴斯有功能未嘗驕矜欲保勲績而爾之前事人

亦公言幸無爭歆之盟但逼自焚之勢洎乎連坐得以惟
輕懼罪而不懈於心補過而願陳其力是用徵爲環尹兼
復疏封載加論道之名俾重棄瑕之典庶乎有位知我念
功

授寧遠軍節度使蓋寓左武衛上將軍制

勅環衛之設貴同命卿有以大將軍之名加其秩者賞典
彌重具官蓋寓凡天下統帥將佐勤勞每至賞勲鮮當仗
鉞吾以克用事君有偉節匡國有大功而寓預謀必忠推
誠必順致我藩后光於冊書是以特越舊章授之師律頗

能謙讓復願改張得不表以寵休陟居戎列仍遂再三之請俾圖始卒之心直舉訓辭是爲嘉善

授前左千牛衛大將軍李鎔右驍衛大將軍右千

牛將軍江繼美加兼檢校右散騎常侍制

勅具官李鎔等大將軍之設有以總勲翊折衝之屬者有以司禁衛門籍之法者非嚴謹恭愿不可輒居以鎔處交戰之門有勲可庇嚴而能謹蓋稟於家以繼美當銜珠之名有勇可使恭而且愿復秉於心咸以美材俾遷上列兼秩之寵勸善並行

欽定全唐文卷八百三十二目錄

錢珣二

授前左武衛將軍李儔左領軍衛大將軍前右監
門衛大將軍江繼美左領軍衛大將軍制

授前威勇軍節度都指揮使楊承襲左千牛衛大
將軍制

授牟崇厚右千牛大將軍等制

授前驍衛大將軍劉崇文左羽林大將軍知軍事
等制

授王知遠左衛將軍制

授陳班右金吾衛將軍制

授高彥宏右金吾衛將軍制

授楊約左驍衛將軍并焦敬復左領軍衛將軍制

授左威衛將軍安宏度右監門衛將軍制

授郭師簡右衛制置使右羽林將軍制

授前千牛衛將軍徐棨右神武將軍兼知軍事等

制

授右千牛衛將軍李璠等右威衛將軍制

授王存禮左威衛將軍制

授王牘太子賓客制

授前沂王傅賜紫殷盈孫可太子右庶子等制

授左司郎中鄭凝吉京兆少尹前龍州刺史韋貽

範右司郎中制

授前左司員外郎趙均長安縣令制

授前右補闕孫偓長水縣令賜緋制

授李繼文隴州防禦使制

授潁州刺史充本州防禦使王敬堯加檢校太子

太保制

授齊州刺史充武肅軍防禦使朱玘加檢校司空

制

授鹽州刺史李太直充本州防禦使制

授李襲刺史等制

授傅德昭羅州刺史裴昶維州刺史趙贇崖州刺

史等制

授劉玉新州刺史劉潛南五州防禦使高州刺史

制

授成希戡忠州王進誠嚴州刺史等制

授保大軍節度掌書記檢校右散騎常侍房仁寶
檢校禮部尚書充職制

授朔方軍節度掌書記檢校刑部員外郎兼侍御
史李東序檢校司勳郎中兼中丞充職制

授鳳翔節度掌書記范惟乂左拾遺賜緋充職制
授竇回鳳翔節度副使崔澄觀察判官韓偓節度
掌書記等制

授保大軍節度判官鄭晦朝散大夫檢校工部尚

金史卷之二十二 官制三
書觀察支使劉源長檢校刑部郎中節度推官
張道樞檢校祠部郎中觀察推官韓伎檢校工
部員外郎招討推官高頎檢校水部員外郎並
充職等制

授同州防禦判官崔洎充節度判官長春宮巡官
郭璘充掌書記防禦推官王丞雍充節度推官
等制

授前河中府少尹張處休加檢校郎中靜海軍節
度副使沈琮檢校員外郎充職裴綽澠池縣令

蔣扮臨晉縣令等制

授攝淮南觀察支使田光嗣檢校郎中充職李潛
嶺南西道觀察支使長蘆縣令房殷兼侍御史
等制

授楊知權袁州司馬陳錫温州長史楊澄端州司
馬等制

授魏州別駕張景裕等四人正授制

授魏博節度副使守左司馬知府事長沙縣開國
子羅紹威檢校司徒進封開國侯制